

ARRANTZA. Hamabostek erreforma eztabaidatuko dute asteartean

Erreformaren alde egin du Fischlerrek, eta sektoreak haren dimisioa eskatu du

Martin Agirreren iritziz, Bruselak politikoki erabiltzen ditu zifrak

Erredakzioa | **DONOSTIA**

Franz Fischler Europako Batzordeko Nekazaritza eta Arrantza komisarioa Madrilen izan zen atzo, arrantza politika erreformatzeko orain gutxi aurkeztu berri dituen proposamenak defenditzen. Arrantza sektorea Fischlerren bisitaz baliatu zen komisario austriarraren dimisioa eskatzeko.

FEOPE Espainiako Arrantza Elkarteen Federazioak jakinarazi zuenez, Europako Batzordeko presidente Romano Prodi gutun bat igorri diote, Fischler bere kargutik kentzeko eskatuz. Komisarioaren erreforma planak «oinarri zientifiko eskasa eta sektorearen gaitzespen osoa» duela esan diote han Prodiri.

Euskal arrantzaleen ordezkariak ere kritikatu zuten komisarioa. Pasaiko Armadorean idazkari Martin Agirrek euskal arrantzaleak ere Bruselaren erreformaren aurka daudela erakutsi nahi izan zion Fischlerri. «Europako Batzordeak politikoki erabiltzen ditu datuak», Agirreren ustez; eta «itsas baliabideen eta Europako arrantzaleen benetako egoera ez du eza-gutzen». Horregatik, Fischlerrek proposatutako erreformak «inolako zentzurik» ez duela berretsi zuen.

Europako Arrantza komisarioak, berriaz, arrantza erreforma oraindik irekita dagoela esan zien arrantzaleei, eta «negoziazioan parte hartzeko» deia egin zien. Hala ere, arrantza jarduerara murriztu beharra dagoela berretsi zuen.



MONDELO/ EFE
Franz Fischler Arrantza komisarioa atzo Madrilen izan zen.

Erreforma indarrean sartzen bada, «Espainiako eta Portugalgo arrantzaleek abantailak ere izango dituzte», Fischlerrek azaldu zuenez, «Europa iparraldeko arrantzategietako ateak irekita izango baitituzte».

Horrela, datorren urtarriletik aurrera Baltikoko eta Iparraldeko itsasoko uretan arrantza egiteko aukera izango dute Gipuzkoa eta Bizkaiko arrantzaleek ere. Espainia eta Portugal epe baterako debekua jarri zion Bruselak ur horietan arrantzatzeko, baina epe hori bukatutzat emango du urte honen amaieran, Fischlerrek Madrilen esan zuenez.

Europako Batzordeak iragan

asteen onartutako arrantza erreforma horrek Europako Batasuneko Arrantza ministroen onespina behar du indarrean sartu aurretik. Horretarako, datorren asteartean egingo dute aurreneko bilera.

Itxura guztien arabera, akordiora iristea ez da hain erraza izango, EBko kide batzuek dagoeneko iragarri baitute Fischlerren erreformaren kontra egingo dutela. Espainia, Portugal, Italia, Frantzia, Grezia eta Irlandak «gehiagizkotzat» jotzen dute Bruselaren asmoa. Erresuma Batua, Suedia, Danimarka eta Herbehereek, osteraz, erreformaren aldeko jarrera erakutsi dute orain arte.

LABURRAN

Ondarroako Udalak ABLE Aldi Baterako Lan Erakundearen aurkako mozioa onartu du

Ondarroako Udalak ABLEen aurkako bost puntuko mozioa onartu zuen herenegun. Esaterako, ez du inongo kontratazio-rik egingo ABLEen bidez, edozein azpikontratazio egin aurretik kontuan hartuko ditu enpresaren lan baldintzak, eskaera berezia luzatuko die enpresei ABLEen bidez kontratazio-rik ez egiteko, herriko ABLEak enpresa *non grata* deklaratu du eta Lea Artibaiko udalei dei berezia egiten die eskualdeko Adecco ABLEari buruz mozio hori lantzeko.

Udalak ere lan arriskuen prebentzioaz arduratzea pozgarria da Azkarragarentzat

Euskal udalak langile publikoen lan segurtasun eta arriskuen prebentzio kontuez arduratzen hasiak direla eta, hori «urrats bikaina» dela adierazi zuen atzo Irunen Joseba Azkarraga EAEko Lan sailburuak. Urratsa «beste enpresentzat eredugarri» izan behar dela uste du, lan istripuak gutxitzeko helburuarekin.

EB zigor neurriak prestatzen ari da AEBen aurka, altzairuaren aferagatik

Europako Batasuneko (EB) Atzerri ministroek datorren astelehenean eztabaidatuko dituzte Amerikako Estatu Batuen (AEB) aurkako zigor neurriak. Europako Batzordeak AEBetako produktu batzuen inportazioen gaineko aduana sariak ezartzeko egindako proposamena ontzat hartuko dutela aurreikusita dago.

Gipuzkoako eta Shangaiko Merkataritza Ganberen arteko hitzarmena enpresa harremanak sustatzeko

Gipuzkoako eta Shangaiko (Txina) Merkataritza Ganberak hitzarmena sinatu zuten atzo Donostian, bi lurraldeetako enpresen arteko harremanak sustatzeko. Txinako enpresaburuak ordezkariak batek egindako bisitaldian izenpetu da hitzarmena. Gipuzkoako Ganberak uste du hitzarmena zeharo onuragarria izango dela Gipuzkoako enpresentzat, Txinako merkatuak zabaldu ahal dizkien aukerak ikusita.

ELA eta LABek erizainen greba zapuztu nahi dutela salatu du SATSE sindikatuak

Datorren astearterako SATSEk deitutako greba «zapuztea nahi dute ELA eta LABek», erizainen sindikatuaren arabera. «Langileei borrokarako animoak kentzen» saiatu dira ELA eta LAB, SATSEren hitzetan. Izan ere, greba hori «demagogikoa eta oportunistak» zela esan zuten bezperan bi sindikatuak.

AEBetako langabezia 0,2 puntu jaitsi zen maiatzean, %5,8ko tasaraino

AEBetako langabezia tasa bi hamarren jaitsi zen iragan maiatzean, %6tik %5,8ra hain zuzen, aurreko apirilean azken zortzi urtetako tasarik altuenera iritsi eta gero, atzo kaleratutako datuen arabera. Guztira 8,4 milioi langabe zeuden maiatzean AEBetan, hango ekonomiak 41.000 lanpostu sorrazarazi ostean.

BURTSA. Europa osoko galerez gain, kezka iturri da Brasil

‘Minimo minimorum’

J. B. Andueza |

Hondoa jotzeak beherago ez goazela esan nahi du. Burtzak urteko minimoa jo du, baina ez dago argi hondoa jo duen. Atzo Ibex-35eko akzioen 2.100 milioi euro salerosi ziren eta jaitzierak dezentekoak izan ziren, urteko minimo berria finkatzeraino. Brasilen interesak dituz-


ten BBVA (-%1,76), baina batez ere SCH (-%2,26) eta Telefonica (-%2,67) egurra jaso zuten. Edurnezuri 10 euroz azpitik dago (30etik gora ikusi izan badugu ere), eta bere ipotx onena %1,53 galdu zuen TerraLycos izan zen. 6 euroen maila ere galdua du jada txerritxo ohiak. TPI eta Prisak ere %3 pasatxo galdu zuten.

DATUA

Mozkinaren laurdena Brasilen biltzen du Telefonica, eta %5 baino ez Argentinan. SCHk, berriz, 680 milioi euro irabazi zituen iaz Brasilen. Urrian egingo diren hauteskundeetan Lula da Silva hautagaia da faborito, baina merkatuen mesfidantza pizten du, jaitzierak eraginez.

Bilboko 2000 indizea

Diferentzia **-%1,19** | Azken indizea **1.316,45** | Aurreko indizea **1.332,35**



Beste indizeak

New York (Dow Jones)*	9.552,57 (-%0,75)
Tokio (Nikkei)	11.438,53 (-%1,18)
Madril (IBEX-35)	7.480,6 (-%1,28)
Paris (CAC-40)	4.020,27 (-%1,90)
Londres (FTSE 100)	4.920,4 (-%0,75)
Frankfurt (DAX)	4.602,74 (-%1,18)
Milano (Mibtel)	20.886 (-%0,76)

* Egutirako arte

Dibisen merkatua

Pezeta	166,386
Libera	6,55
Dolarra (AEB)	0,9452
Libera Esterlina	0,6465
100 Yen (Japonia)	1,1756